

【簡單个幸福】徐姿華原作

打早，涼涼微風並柔柔天光，掀開間房个白紗窗簾，同正對甜甜夢肚醒來个僵攞手；難得个放棄日，搵在眠床看日頭輕輕仔徒步、聽窗門外背鳥仔聲唧啾，時間乜像恬恬頓腳咧，啊！這靚靚个朝晨。

食過朝，想去遠久無見个朋友。自家駛車仔，時間就在自家个手頭項，做得慢慢仔行、定定仔奈；經過鬧熱个街市，車輪仔慢慢仔轉入鄉道，來到苗栗个穀倉——灣裡。路个兩片，金黃飽米个禾串仔硬硬會對禾田滄出來哩；風吹來，該一陣一陣歡喜到手攘腳踏¹、搖頭扭腰个金黃稻浪，實在還靚。田脣企等兩個在該比手畫腳个阿伯，日頭晟來，笠嫫下晒到烏刻刻仔个面項，單淨看著兩排雪白个牙齒，想來應該當滿意今年係好年冬啦！

幹過一個大彎幹，共樣係闊野野个禾田，直直透到山下；深深淺淺个黃襯等嫩青个田脣、浸青个大樹，就像係天公伯个調色盤，乜係這個豐收个季節正會有个景色。該向有幾坵仔既經收成忒早冬禾，準備愛過時二冬禾个禾田。田水清清清，同朗朗个藍

天、白雲、田脣个樹仔、人家屋，明明明个反映出來，就像係框在田脣做个相框裡肚个相片，實在有罅靚。這向堵好有一坵田還當在該割禾，紅色个割禾機在田肚緊行緊割，三、四儕人在脣項搵手，歡喜个做到無閒泊杈；割禾機後背跔歸陣个白鶴仔，有兜低頭絡食、有兜大步尋食、有兜飛高飛低搶食，鬧熱煎煎，這就係禾田肚盡有生命力个畫面咧啦！

車仔慢慢仔溜入莊頭，伏在路脣个老狗牯看著車仔來，伸懶筋企起來拂尾，就像係迎接老朋友樣仔。一個著花衫个老伯姆跔在屋面前个菜園摘菜，菜園分屋仔蔭等、日頭還吉會晒著，青荷荷个菜葉面還承等露水，看來當萋、當錫人食樣仔。兩個國小年紀个細阿俵仔，一儕定定仔踏等自行車，一儕半行半走、手項拗等籃球，兩儕嘻嘻哈哈有講有笑愛共下去打球仔。這一路个光景，實在分人心情舒爽。

主人家款好一桌點心、番豆同瓜子，還有清香个高山烏龍茶，三、四個真久無見面个老朋友，天南地北講到毋知天合地。茶香、情醜，靚靚个日頭、靚靚个心情，這就係簡單个幸福。

¹ 手攘腳踏：音 su` ngiong` giog` tab；手、腳舞動跳躍。形容非常高興喜悅的樣子。

【幸福个味緒】黃美貞原作

老古人言：「食了五月粽，被骨正上棟。」五月節正過忒，當晝開始天時就熱到佇毋著，該載堵好係梅雨季節，落過雨、起風吔，將就摻冷氣關忒，行到窗門脣感受熱天難得个涼風。除忒幸運看著天邊靚靚个七彩天弓，還鼻得著打馬膠路¹分日頭花煎過、分雨水打過以後淡淡、香香个味緒，臨暗頭窗門外背一陣一陣「揸、揸、揸！揸、揸、揸！」个蟬仔聲順等清風傳入屋肚來。

恁起還細時節，熱爌爌个下晝頭，恁恁多姊妹會摻隔壁鄰舍个細人伴仔共下搞，輒常搞到斷烏，聽著阿姆開聲喊：「好轉來洗手食飯咧！」正盼得轉屋。

吾爸係客運司機，平常時愛輪班，故所總係暗晡頭八、九點正下班。當記得係堵好該日無伸麼个飯菜，吾爸會自家煮麵食。逐擺佢就摻蒜頭礮礮啊、再剁到幼幼，泔一息仔豆油還過香油，先放在碗公肚，續等摻煮好个麵撈起來，水泌昇燥，再同麵倒到碗公，摻麵同蒜頭、配頭攪昇勻，該央時係聽著吾爸問：「有麼

人愛食麵無？」佢這兜就盡暢，遽遽飄入灶下，你一口、佢一口，又賺著一餐香噴噴个大麵點心，食到飽餬餬仔，還幸福哪！吾爸同伸个飯菜間等伸無幾多條个大麵，儘採划落肚，就恁樣過一餐。

又還記得，熱天臨暗頭洗好身腳，等到食飽夜，碗筷撿掣，寫好作業，看一下電視，細人仔還細又好搞，差毋多到愛上眠床該下，又一身汗吔；毋過，頭擺屋下無恁好額，淨有一隻間房安有冷氣定定。阿姆會提早半點鐘摻冷氣拘開來，等大家愛睡目該下，間房門打啊開來，涼沁沁个冷氣，還有阿姆拿去晟過日頭个被骨，散出香香个日烈味緒，歸屋下人尖在兩頂眠床項，黏時就睡落覺咧。

這幸福个滋味一直囿在吾心肝頭，毋多知仔成人長大、做人阿姆以後，正知「賺錢可比針挑笏，使錢可比水推沙。」正體會著爺哀頭擺辛苦畜大佢這兜恁多个細人仔、愛理一個家哪有恁該？毋過該愛盡个責任摻義務，佢兜從來都毋識放忒過。

¹ 打馬膠路：音 da` ma` gau` lu；柏油路。

【特別个水煎包】曾俊鑾原作

水煎包這種傳統點心滿哪仔都看得著，臺灣个水煎包大體係包玻璃菜个，毋過當好運，佢在學校食過一種特別个水煎包。

下晝三點過後日頭轉影¹，天時較涼哩，下課同學會湊等去打籃球，成下仔會看著，一個背痾痾个外省老阿伯企在側角。佢拗等一隻籃仔，當像驚人知樣仔，把守一隻無法度講个秘密，佢出現个時節總係看東看西，等佢兜行前去，正細心細意掀開蒙在籃仔頂背个布仔，係一籃正起鑊無幾久還燒爇爇仔个水煎包。

佢兜當當在該轉骨²，做儘像飯豚仔³樣仔，到下晝早就枵到肚屎憑背囊哩，逐儕歡喜塵天撈錢相爭愛買。該無帶錢又想愛食个人愛仰結煞正好呢？佢兜會講：「這擺你先請，下二擺換佢請你，好無？」兩下半，本成疊到錐錐个水煎包就分人拿忒兩三層。

水煎包下背墊張紙，佢兜連洗手都懶，五支手指頭托等，開

嘴就齧⁴落去，當像毋會爇人樣仔，緊呵緊講：「好食！好食！」水煎包有較赤⁵，老阿伯盡周到，既經薄薄仔先掌過辣油，佢个水煎包係正宗上海、蘇州个江南口味，豬肉做个料仔，摻等雞卵、蔥仔、香油、鹽這兜配料，係講若个嘴罈精，你還食得出有搵到綿綿个薑嫲，毋敢食辣个同學，乜試著好食。

佢兜緊食緊摻隔壁球場个人攞手，摻食到伸半隻个水煎包拿到高高，喊佢兜愛買就愛趕緊，機會難得，過忒這滿，下二滿毋知愛等到哪時。結果，佢兜做儘分好食个水煎包錫錫過來，連平常較有規矩个細妹仔乜湊陣走等過來，老阿伯个嘴角慢慢仔有一息仔笑。

毋過，一陣嘩嘩仔聲就像風馳雨⁶，摻這場正開始鬧熱个生理打到浪浪散，高中部个教官仔行過來哩，佢本成就面逼逼，這下還較像牛頭馬面，大自家走到尾瀉屎，外省老阿伯乜摻籃仔攞起來，恬恬行往出，對哪搭仔出現，就對哪搭仔毋見忒去。

單淨水煎包个味緒還留在佢兜个嘴角。

¹ 日頭轉影：音 ngid` teu` zon` iang`；日影偏斜。

² 轉骨：音 zon` gud`；指兒童體格發育為成人體格的過渡階段。

³ 飯豚仔：音 fan tun` e`；指將到青春期末紀食量特別大的人。

⁴ 齧：音 sen；咬。

⁵ 赤：音 cag`；黃褐色，喻煎得表皮焦黃。

⁶ 風馳雨：音 fung` cii` i`；西北雨。